

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी कह्यो-नुवो भारत नुवा नजरिया अर नुवी सोच सागै बध रह्यो है।
- प्रधानमंत्री रा कुछ चुणी ज्या भाषणां माथे आधारित किताब रो विमोचन-पोथी मांय प्रधानमंत्री मोदी रा विचार, संकल्प अर फैसलो लेवण री प्रतिबद्धता पेश करीजी।
- राज्य रा लंकाऊ-ऊगणी हलकां मांय बिरखा रो दौर जारी-सांखां ने नुकसाण रो अंदेशो-विधायक गोपीचंद मीणा विधानसभा मांय फसल खराबा रो मुद्दो उठायो।

अर

- उत्तराखण्ड रा उत्तरकाशी मांय भूस्खलन रे कारण फंस्यो प्रदेश रा कोई चार सौ जणा ने सुरक्षित ठोडां पूगयी ज्या।

000

प्रधानमंत्री नरेन्द्र मोदी कह्यो है के नुवो भारत तेजी ऊं समस्यावां रा हमेशा सारु निपटारा मांय नेता रा तौर ऊं सामी आ रह्यो है। वे गुजरात रा एकता नगर मांय राज्यां रा पर्यावरण मंत्रियां रा राष्ट्रीय सम्मेलण मांय वर्चुअल तरीका ऊं बोल रह्या हा। प्रधानमंत्री कह्यो के भारत अन्तर्राष्ट्रीय सौर ऊर्जा गठबंधन ले र जीवन शैली सरीखा कामां मांय अगाड़ी है। वे कह्यो के नुवो भारत नुवी सोच सागे आगे बध रह्यो है। वे कह्यो के भारत तेजी ऊं विकसित व्हे रही माली व्यवस्था है अर पारिस्थितिकी ने लगातार मजबूत कर रह्यो है।

000

प्रधानमंत्री कह्यो के देश मांय जंगलात हलको बध्यो है अर नम भूमि ई तेजी ऊं बध रही है। प्रधानमंत्री कह्यो के लारला कुछ साल मांय शेर, बाघ, हाथी, एक सींग वाळा गैंडा अर तेंदुआं री तादाद बधी है। प्रधानमंत्री कह्यो के भारत मांय चीतां रो गर्मजोशी ऊं स्वागत, आतिथ्य सत्कार री मिसाल है। वे राज्यां ऊं पर्यावरण ने बचावण मांय सब ऊं चोखी कार्यप्रणाली सीखण अर वां ने पूरा देश मांय कामयाबी सागे लागू करण बाबत् कह्यो। प्रधानमंत्री राज्यां ऊं साल 2070 ताई कार्बन उत्सर्जन बिल्कुल खत्म करण सारु एकजुट व्हे र काम करण बाबत् कह्यो। सम्मेलण मांय केंद्रीय पर्यावरण मंत्री भूपेंद्र यादव कह्यो कै जिन्दगी ने आसान बणावण, जलवायु मांय बदलाव ऊं जुडी चुनौतियां रो सामो करण, वानिकी प्रबंधन, प्रदूषण री रोकथाम अर नियंत्रण, जंगली जिनावरां रा प्रबंधन, प्लास्टिक अर कचरा प्रबंधन समेत न्यारा-न्यारा मुद्दां माथे ध्यान दियो जावेला।

000

प्रधानमंत्री नरेन्द्र मोदी रा चुनिन्दा भाषणां माथे आधारित पोथी रो विमोचन पैली वाळा उपराष्ट्रपति एम. वेंकैया नायडू, केरल रा राज्यपाल आरिफ मोहम्मद खान अर सूचना अर प्रसारण मंत्री अनुराग ठाकुर आज नई दिल्ली मांय आकाशवाणी भवन मांय कीनो। ई किताब रो नाम है-सबका साथ, सबका विकास, सबका विश्वास-प्राइम मिनिस्टर नरेन्द्र मोदी स्पीक्स। किताब मांय नुवा भारत रा बारा मांय प्रधानमंत्री री सोच रो दरसाव करी ज्यो है। ई मौके नायडू कह्यो कै ई पोथी मांय मोदी सरकार रा विचार, संकल्प अर फैसला करण री प्रतिबद्धता पेश करीजी है। पैली वाळा उपराष्ट्रपति नायडू कोविड महामारी रे दौरान प्रधानमंत्री री अगुवाई री सराहवणा करता थकां कह्यो कै कम बगत मांय अपेक्षित क्षमतावां बधायी ज्यी। वे कह्यो कै देश मांय कोविड ऊं बचाव रा टीका बणा र दो सौ करोड ऊं बत्ता टीका लगा दिया ज्या। सूचना अर प्रसारण मंत्री अनुराग ठाकुर कह्यो कै ई किताब मांय माली व्यवस्था, संस्कृति ने बचावण, साफ अर हर्या-भर्या भारत, विज्ञान आ प्रौद्योगिकी अर खेल समेत न्यारा-न्यारा मुद्दां माथे प्रधानमंत्री रो नजरियो पेश करी ज्यो है। हिन्दी अर अंग्रेजी मांय छप्योडी आ पोथी प्रकाशन विभाग रा बिक्री काउंटर अर सूचना भवन री पुस्तक दीर्घा मांय मिलेला। इण ने प्रकाशन विभाग री वेबसाइट अर भारत कोष प्लेटफार्म ऊं ई ऑनलाइन खरीदो जा सके है। आ पोथी डिजिटल रूप मांय अमेजन अर गूगल प्ले स्टोर माथे ई मिलेला।

000

प्रधानमंत्री नरेंद्र मोदी ई दीतवार 25 सितम्बर ने आकाशवाणी ऊं प्रसारित कर्या जावण वाळा खास कार्यक्रम मन की बात मांय विचार बतावेला। आ हर महीना प्रसारित कर्या जावण वाळा ई कार्यक्रम री 93 वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। आकाशवाणी समाचार री वेबसाइट अर न्यूज़ ऑन ए.आई.आर. मोबाइल ऐप माथे ई ओ कार्यक्रम उपलब्ध व्हेला। आकाशवाणी समाचार, दूरदर्शन समाचार, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई ओ कार्यक्रम सीधो प्रसारित कर्यो जावेला।

000

स्वास्थ्य मंत्री मनसुख मांडविया, आयुष्मान भारत प्रधानमंत्री जन-आरोग्य योजना रा चार साल पूरा व्हेवण रा उपलक्ष मांय दीतवार ने आरोग्य मंथन-2022 रो उद्घाटन करेला। आ योजना कमजोर पिरवारां ने हर साल पांच लाख रुप्या रो स्वास्थ्य बीमा मुहैया करा रही है। इण रो मकसद देश मांय दस करोड़ ऊं बत्ता गरीब पिरवारां ने फायदो पूगावणो है। प्रधानमंत्री नरेंद्र मोदी सितंबर 2018 मांय इण री सरूआत कीनी ही। दो दिन रा ई कार्यक्रम मांय स्वास्थ्य सेवा हलका रा वैश्विक अर राष्ट्रीय विशेषज्ञां सागै शिक्षाविद, बुद्धिजीवी, उद्योग अर संचार माध्यमां रा नुमाइन्दा शिरकत करेला।

000

प्रदेश रा ऊगणी अर लंकाऊ जिला मांय हाल ई व्ही बिरखा ऊं काश्तकारां री चिंता बध ग्यी है। लारला तीन दिन ऊं रूक-रूक र व्हे रही हल्की ऊं मध्यम दर्जा री बिरखा ऊं बाजरा, तिल अर मक्की समेत दूजी साखां ने नुकसाण व्हेवण री शंका है। तकनीकी शिक्षा मंत्री डॉ. सुभाष गर्ग, मुख्यमंत्री अशोक गहलोत अर कृषि मंत्री लालचन्द कटारिया ने कागद लिख र फसल खराबा री खास गिरदावरी करावण री अरज कीनी है। ई बीचे अजमेर, भरतपुर, जयपुर, कोटा अर उदयपुर संभाग रा जिलां मांय एक और पश्चिमी विक्षोभ रे कारण मौसम ओजू पलट ग्यो। राजधानी जयपुर अर आरे-सारे रा हलकां मांय संवारे ऊं बिरखा व्हे रही है। जोधपुर अर आरे-सारे रा गांवां मांय बिरखा रे कारण बाजरा, मूंग और ज्वार री साखां रे भीज र खराब व्हेवण री शंका है। भीलवाड़ा जिला रा बिजौलियां अर दूजा हलकां मांय व्ही जोरदार बिरखा ऊं साखां ने नुकसाण व्ह्यो है। जहाजपुर विधानसभ हलका रा विधायक गोपीचंद मीणा आज विधानसभा मांय ई हलका मांय बिरखा रे कारण साखां ने व्ह्या नुकसाण रो मामलो उठाता थकां कह्यो के वठे साखां पूरी तरह खराब व्हे ग्यी है। विधायक मीणा कह्यो के ग्राम पंचायत बांकरा, बरोदा अर दूजी ग्राम पंचायतां रा केई गांवां रा खेतां मांय पाणी भर्यो है अर केई कच्चा-पक्का मकान ढस ग्या। वे सर्वे करा र पीड़ित लोगां ने मुआवजो देवण री मांग कीनी। चित्तौड़गढ़ जिला मांय ई बिरखा व्हे रही है।

000

उत्तराखण्ड रा उत्तरकाशी जिला मांय भूस्खलन रे कारण फंस्यो राजस्थान रा कोई चार सौ लोगां ने सुरक्षित ठोडां पूगायी ज्या है। प्रदेश एसडीआरएफ रा कमाण्डेन्ट राजकुमार गुप्ता बतायो कै गबनानी हलका मांय व्ही जोरदार बिरखा रे कारण राजस्थान रा अ लोग फंस ग्या हा। वे बतायो कै प्रदेश रा सगळा मुसाफिर हिफाजत सागै है।

000

भीलवाड़ा जिला रा जहाजपुर थाना हलका मांय एक कार अर ट्रेलर री टक्कर मांय तीन जणां री मौत व्हे ग्यी अर दो बच्चां समेत पांच जणा जख्मी व्हे ग्या। पुलिस रे मुजब कोटूकोटा रा रेहवासी लोगां री देवली री ओर ऊं आ रही कार ने सामी ऊं आ रह्यो ट्रेलर टक्कर मार दीनी। हादसा मांय जख्मी लोगां ने ईलाज सारु भीलवाड़ा रेफर कर दिया ज्या है।

000

प्रधानमंत्री नरेंद्र मोदी ने भेंट करी ज्या उपहारां री ई-नीलामी चाल रही है जो 2 अक्टूबर ताई चालेला। इण मांय एक हजार 222 स्मृति चिन्ह शामिल करी ज्या है। उपहार रो न्यूनतम आधार मूल्य एक सौ रुप्या अर अधिकतम मूल्य पांच लाख रुप्या राख्यो ज्यो है। आज दिव्यांग बच्चां समेत साढे तीन सौ ऊं बत्ता बच्चा राष्ट्रीय आधुनिक कला संग्रहालय देखण सारु आया। आं उपहारां ने संग्रहालय मांय रखी ज्या है। संग्रहालय रा निदेशक तेमसुनारो जमीर कह्यो कै आज अंतर्राष्ट्रीय सांकेतिक भाषा दिवस रे मौके न्यारी-न्यारी पृष्ठभूमि रा बच्चां ने अ उपहार देखण सारु बुलायी ज्या हा।

000

ऊन हलका रा हितधारकां री दो दिन री राष्ट्रीय बैठक आज जयपुर मांय सरू व्ही। कपड़ा मंत्रालय रा सचिव उपेन्द्र प्रसाद सिंह री सदरत मांय व्हे रही मीटिंग मांय ऊन हलका रा विकास अर ऊन उद्योग

मांय अनुसंधान सागै सरकारी संगठनां अर दूजा हितधारकां ऊं जुड्या मुद्दा माथै चर्चा करी ज्यी। मीटिंग मांय वूल रिसर्च एसोसिएशन अर सेंद्रल शीप एंड वूल रिसर्च इंस्टीट्यूट री ओर ऊं अनुसंधान अर विकास री परियोजनावां रा बारा मांय पावर प्वाइंट प्रेजेंटेशन दियो ज्यो। लद्दाख स्वायत्त पहाडी विकास परिषद री ओर ऊं लद्दाख हलका मांय लागू एमओटी रा कार्यक्रमां रा बारा मांय प्रस्तुति दीरीजी।